

**MEĐUNARODNI KRIVIČNI SUD
ZA BIVŠU JUGOSLAVIJU**

PREDMET BR. IT-98-32/1-R77.2

TUŽILAC MEĐUNARODNOG SUDA

PROTIV

JELENE RAŠIĆ

OPTUŽNICA

Tužilac Međunarodnog krivičnog suda za bivšu Jugoslaviju (dalje u tekstu: Međunarodni sud), na osnovu pravila 77 Pravilnika o postupku i dokazima Međunarodnog krivičnog suda za bivšu Jugoslaviju (dalje u tekstu: Pravilnik Međunarodnog suda), optužuje:

JELENU RAŠIĆ

za **NEPOŠTOVANJE MEĐUNARODNOG SUDA.**

OPTUŽENA

1. **JELENA RAŠIĆ**, od oca Momčila, rođena je 19. aprila 1983. u Šibeniku, Hrvatska. Sve vrijeme na koje se odnosi ova optužnica, **JELENA RAŠIĆ** postupala je kao član tima odbrane Milana LUKIĆA u predmetu *Tužilac protiv Milana LUKIĆA i Sredoja LUKIĆA*, predmet br. IT-98-32/1-T (dalje u tekstu: predmet *LUKIĆ i LUKIĆ*), u kom je tada rješavalo pretresno vijeće Međunarodnog suda.

OPTUŽBE

TAČKA 1

NEPOŠTOVANJE MEĐUNARODNOG SUDA

2. Dana 18. oktobra 2008. ili oko tog datuma, Jelena RAŠIĆ je svjesno i hotimično ometala provođenje pravde na Međunarodnom sudu time što je od **Zuhdije TABAKOVIĆA** pribavila lažnu izjavu svjedoka.
3. **Jelena RAŠIĆ** sastala se sa Zuhdijom TABAKOVIĆEM u Sarajevu, Bosna i Hercegovina, i pokazala mu prethodno pripremljenu izjavu svjedoka koju je trebalo upotrijebiti u predmetu *LUKIĆ i LUKIĆ*. **Jelena RAŠIĆ** zatražila je od Zuhdije TABAKOVIĆA da potvrdi, potpiše i ovjeri tu izjavu u zamjenu za 1.000 eura u gotovini. Obećala mu je da će dobiti još novca ako dođe u Haag da u skladu s izjavom svjedoči u korist Milana LUKIĆA u predmetu *LUKIĆ i LUKIĆ*. **Jelena RAŠIĆ** je znala da je izjava uzeta kako bi bila upotrijebljena u postupku u vezi s Milanom LUKIĆEM u predmetu *Lukić i Lukić*.
4. Dana 20. oktobra 2008., **Jelena RAŠIĆ** sastala se sa Zuhdijom TABAKOVIĆEM u zgradi Opštine Novi Grad (Sarajevo). On je potpisao više primjeraka izjave s datumom od 20. oktobra 2008. i te potpise je istog dana potvrdio i ovjerio opštinski službenik. **Jelena RAŠIĆ** zadržala je original izjave i dala Zuhdiji TABAKOVIĆU jedan primjerak. Ta izjava je bila lažna budući da Zuhdija TABAKOVIĆ nije imao nikakvih saznanja o bilo kojem od događaja navedenih u izjavi.
5. Nakon što je potpis Zuhdije TABAKOVIĆA na izjavi ovjeren, **Jelena RAŠIĆ** je dala Zuhdiji TABAKOVIĆU kovertu u kojoj je bilo 1.000 eura.
6. Dana 20. oktobra 2008. ili oko tog datuma, **Jelena RAŠIĆ** dala je Zuhdiji Tabakoviću mapu koju je navodno nacrtao Milan LUKIĆ kako bi Zuhdiji TABAKOVIĆU pomogao da se tokom svjedočenja sjeti pitanja sadržanih u njegovoj lažnoj izjavi.

Svim navedenim radnjama i propustima, **Jelena RAŠIĆ** je svjesno i hotimično ometala provođenje pravde na Međunarodnom sudu i počinila:

Tačka 1: Nepoštovanje Međunarodnog suda, kažnjivo u skladu s inherentnim ovlaštenjima ovog Međunarodnog suda i pravilima 77(A) i (G) Pravilnika Međunarodnog suda.

TAČKA 2

NEPOŠTOVANJE MEĐUNARODNOG SUDA

7. Dana 18. oktobra 2008. ili oko tog datuma, **Jelena RAŠIĆ** je svjesno i hotimično ometala provođenje pravde na Međunarodnom sudu time što je ohrabrila i/ili ubijedila Zuhdiju TABAKOVIĆA da pribavi lažne izjave svjedoka.
8. Dana 18. oktobra 2008. ili oko tog datuma, tokom sastanka sa Zuhdijom TABAKOVIĆEM, **Jelena RAŠIĆ** mu je predočila sadržaj dviju dodatnih prethodno pripremljenih izjava koje su trebale biti upotrijebljene u predmetu *LUKIĆ i LUKIĆ* i u kojima su pojedini davaocima izjava bile izostavljene. Ona je ponudila Zuhdiji TABAKOVIĆU nagradu ako pronađe još dvojicu ljudi rođenih u Višegradu da potpišu te lažne izjave. **Jelena RAŠIĆ** rekla je Zuhdiji TABAKOVIĆU da će ti ljudi dobiti novac za potpisivanje izjava, kao i da će oni dobiti još novca kada, saglasno tim izjavama budu svjedočili u predmetu *LUKIĆ i LUKIĆ*. Zuhdija TABAKOVIĆ pristao je da pronađe još neke ljude rođene u Višegradu koji će potpisati izjave.

Svim navedenim radnjama i propustima, **Jelena RAŠIĆ** je svjesno i hotimično ometala provođenje pravde na Međunarodnom sudu i počinila ili potakla:

Tačka 2: Nepoštovanje Međunarodnog suda, kažnjivo u skladu s inherentnim ovlaštenjima ovog Međunarodnog suda i pravilima 77(A) i/ili (B) i pravilom 77(G) Pravilnika Međunarodnog suda.

TAČKE 3 i 4

NEPOŠTOVANJE MEĐUNARODNOG SUDA

9. **Jelena RAŠIĆ** je svjesno i hotimično ometala provođenje pravde na Međunarodnom sudu time što je nabavila lažne izjave svjedoka od g. X i od g. Y.
10. Ovaj paragraf se poziva na paragraf 8 Optužnice (gore) i inkorporira ga.
11. Jednog dana u periodu između 17. oktobra 2008. i 24. oktobra 2008., Zuhdija TABAKOVIĆ sastao se sa g. X i g. Y, koji su obojica rođeni u Višegradu, i obojicu upitao da li bi bili spremni da potpišu jednu izjavu a da im se u zamjenu isplati 1.000 eura.
12. Obojica su pristala da potpišu izjavu u zamjenu za isplatu od 1.000 eura. I g. X i g. Y su znali da će stavljanjem svog imena na izjavu i njenim potpisivanjem dati lažnu izjavu.
13. Dana 23. oktobra 2008., Zuhdija TABAKOVIĆ sastao se sa g. X i g. Y u jednom kafiću blizu zgrade Opštine Novi Grad (Sarajevo). Pratio je i jednog i drugog pojedinačno i na smjenu – prvo g. X, a zatim g. Y – iz kafića u zgradu Opštine. Tamo ih je obojicu upoznao sa **Jelenom RAŠIĆ**, koja je g. X i g. Y na smjenu otpratila u zgradu Opštine gdje je kompletirala izjave. Oni su zatim potpisali svoje izjave s datumom od 23. oktobra 2008. i ovjerali svoje potpise kod opštinskog službenika.
14. **Jelena RAŠIĆ** zadržala je originale obiju izjava s datumom od 23. oktobra 2008.
15. Zbog toga što su stavili svoja imena na izjave i potpisali ih, g. X i g. Y su primili po 1.000 eura.

Svim navedenim radnjama i propustima, **Jelena RAŠIĆ** je svjesno i hotimično ometala provođenje pravde na Međunarodnom sudu i počinila:

Tačka 3 (u vezi s g. X): Nepoštovanje Međunarodnog suda, kažnjivo u skladu s inherentnim ovlaštenjima ovog Međunarodnog suda i pravilima 77(A) i (G) Pravilnika Međunarodnog suda; i

Tačka 4 (u vezi s g. X): Nepoštovanje Međunarodnog suda, kažnjivo u skladu s inherentnim ovlaštenjima ovog Međunarodnog suda i pravilima 77(A) i (G) Pravilnika Međunarodnog suda.

TAČKA 5

NEPOŠTOVANJE MEĐUNARODNOG SUDA

16. **Jelena RAŠIĆ** je svjesno i hotimično ometala provođenje pravde na Međunarodnom sudu time što je pribavila lažne izjave svjedoka od Zuhdije Tabakovića i od g. X i od g. Y.
17. Tokom jednog ili više dana u periodu između 23. oktobra 2008. i 6. decembra 2008., **Jelena RAŠIĆ** vratila se u Sarajevo sa nepotpisanim revidiranim verzijama lažnih potpisanih izjava Zuhdije TABAKOVIĆA, g. X i g. Y. **Jelena RAŠIĆ** uspostavila je kontakt sa Zuhdijom TABAKOVIĆEM, dala mu tri nepotpisane revidirane izjave i zatražila od njega da potpiše svoju izjavu i da zatraži od g. X i od g. Y da potpišu svoje. Svaka od tih izjava je bila lažna.
18. Zuhdija TABAKOVIĆ pristao je da potpiše i potpisao je svoju izjavu, te pristao da obezbijedi potpise ostalih na njihovim izjavama. Sve tri izjave s datumom od 5. decembra 2008. potpisane su i vraćene **Jeleni RAŠIĆ**.
19. Dana 20. januara 2009., glavni zastupnik odbrane Milana LUKIĆA predao je tužilaštvu kopije potpisanih izjava Zuhdije TABAKOVIĆA, g. X i g. Y od 5. decembra 2008.

Svim navedenim radnjama i propustima, **Jelena RAŠIĆ** je svjesno i hotimično ometala provođenje pravde na Međunarodnom sudu i počinila:

Tačka 5: Nepoštovanje Međunarodnog suda, kažnjivo u skladu s inherentnim ovlaštenjima ovog Međunarodnog suda i pravilima 77(A) i (G) Pravilnika Međunarodnog suda.

/potpis i pečat na originalu/

Serge Brammertz,
tužilac

Dana 8. jula 2010.
U Haagu,
Nizozemska